

四庫全書

史部

欽定四庫全書

浙江通志卷二百六十

藝文二

狀

奏浙西災傷狀

宋
蘇軾

臣聞事豫則立不豫則廢此古今不刊之語也至於救災恤患尤當在早若災傷之民救之於未饑則用物約而所及廣不過寬減上供糶賣常平官無大失而人人

受賜今歲之事是也若救之於已饑則用物博而所及微至於耗散省倉虧損課利官為一困而已饑之民終於死亡熙寧之事是也熙寧之災傷本緣天旱米貴而沈起張靚之流不先事奏聞但務立賞閉糶富民皆爭藏穀小民無所得食流殍既作然後朝廷知之始勅運江西及截本路上供米一百二十三萬石濟之巡門俵米攔街散粥終不能救饑饉既成繼之以疾疫本路死者五十餘萬人城郭蕭條田野丘墟兩稅課利皆失其

舊勘會熙寧八年本路放稅米一百三十萬石酒課虧減六十七萬餘貫畧計所失共計三百二十餘萬貫石其餘耗散不可悉數至今轉運司貧乏不能舉手此無他不先事處置之過也去年浙西數郡先水後旱災傷不減熙寧然二聖仁智聰明於去年十一月中首發德音截撥本路上供斛斛二十萬石賑濟又於十二月中寬減轉運司元祐四年上供額斛三分之一為米五十餘萬斛盡用其錢買銀絹上供了無一毫虧損縣官而

命下之日所在歡呼官既住糶米價自落又自正月開倉糶常平米仍免數路稅務所收五穀力勝錢且賜度牒三百道以助賑濟本路帖然遂無一人餓殍者此無他先事處置之力也由此觀之事豫則立不豫則廢其禍福相絕如此恭惟二聖天地父母之心見民疾苦匍匐救之本不計較費用多少而臣愚魯無識但知權利害之輕重計得喪之大小以謂譬如庶民之家置莊田招佃客本望租課非行仁義然猶至水旱之歲必須放

免欠負借貸種糧者其心誠恐客散而田荒後日之失必倍於今故也而況有天下子萬姓而不計其後乎臣自去歲已來區區獻言屢瀆天聽者實恐陛下客散而土田荒也去歲杭州米價每斛至八九十自今歲正月以來日漸減落至五六月間浙西數郡大雨不止太湖泛溢所在害稼六月初間米價復長至七月初斛及百錢足陌見今新米已出而常平官米不敢住糶災傷之勢恐甚於去年何者去年之災如人初病今歲之災如

病再發病狀雖同氣力衰耗恐難支持又緣春夏之交雨水調勻浙人喜於豐歲家家典賣舉債出息以事田作車水築圩高下殆遍計本已重指日待熟而淫雨風濤一舉害之民之窮苦實倍去歲近者將官劉季孫往蘓州按教臣密令季孫沿路體訪季孫還為臣言此數州不獨淫雨為害又多大風駕起潮浪隄堰率皆破損湖州水入城中民家皆尺餘此去歲所無有也而轉運判官張璠自常潤還所言畧同云親見吳江平望八尺

間有舉家田苗沒在深水底父子聚哭以船棧撈撓云
半米猶堪炒喫青穞且以喂牛正恐自今雨止已非豐
歲而況止不止又未可知則來歲之憂非復今年之比
矣何以言之去年杭州管常平米二十三萬石今年已
糶米十五萬石雖餘八萬石而糶米未已又緣去年災
傷放稅及和糶不行省倉闕數所有上件常平米八萬
石只可兌撥充軍糧更無見在惟有糶常平米錢近八
萬貫而錢非救饑之物若來年米益貴錢益輕雖積錢

如山終無所用熙寧中兩浙市易出錢百萬緡民無貧富皆得取用而米不可得故曳羅紈帶金玉橫尸道上者不可勝計今來浙東西大抵皆糶過常平米見在絕數少熙寧之憂凜凜在人眼中矣臣材力短淺加之衰病而一路生齒憂責在臣受恩既深不敢別乞閒郡日夜思慮求來年救饑之術別無長策惟有秋冬之間不惜高價多糶常平倉米以備來年出糶今來浙西數州米既不熟而轉運司又管上供年額斛斗一百五十餘

萬石若兩司爭糴米又大貴饑饉愈速和糴不行來年青黃不交之際常平有錢無米官吏拱手坐視人死而山海之間接連甌閩盜賊結集或生意外之事則雖誅殛臣等何補於敗以此須至具實聞奏伏望聖慈備錄臣奏行下戶部及本路轉運提刑兩路鈐轄司疾早相度來年合與不合準備常平斛斛出糴救饑如合準備即具逐州合用數目臣已約度杭州合用二十萬石仍委逐司擘畫合如何措置令米價不至大段翔湧收糴

得足如逐司以謂不須準備出糶救濟即令各具保明
來年委得不至饑殍流亡結罪聞奏緣今來已是入秋
去和糶月日無幾比及相度往復取旨深慮不及於事
伏乞詳察速賜指揮臣屢犯天威無任戰慄待罪之至
謹錄奏聞伏候勅旨

論浙西閉糶狀

宋
蘇軾

本路今歲不熟初水後旱早晚俱傷高下並損已具事
由聞奏去訖勘會本路惟蘓湖常秀等州出米浩瀚常

飽數路漕輸京師自杭睦以東衢婺等州謂之上鄉所
產微薄不了本在所食諺云上鄉熟不抵下鄉一鍋粥
蓋全仰蘇秀等州商旅販運以足官司之用今來雖一
例災傷而蘇秀等州所產終是滂沛訪聞逐州例皆閉
糴嚴立賞罰不許米斛出境是致杭州常平省倉糴買
不行民亦闕食現今粳米已至八九十足錢尋具牒蘇
秀等州不得閉糴訪問逐州雖闕本司指揮依舊閉
糴尋差識字公人陳宥往秀州抄錄到所出榜示二本

其大畧云如有諸色人擡價買米販往別州許人告捉
立定賞多者至五十貫兼取問得杭州米行人狀稱因
遂州現今立賞告捉私販金無米船到州認是遂州官
吏堅意閉糴本司無緣止絕若商旅不行米貴不已公
私窘乏盜賊之類何所不有以此合係本司知管除已
牒轉運提刑司外須至聞奏者

再論閉糴狀

宋
蘇軾

本路災傷本司已兩次奏聞竊見比年以來京東河北

淮南等處災傷並蒙朝廷支賜錢米或於他路截撥斛斗賑救數目至廣今本路災荒不敢便望支賜截撥只乞稍寬轉運使年額上供使得轉換擘畫多方救恤已於十一月十日奏訖至今未奉指揮數內一事蘇湖常秀等州現今米商全不通行不惟逐州立賞閉糴亦為脚錢本重無由興販檢會元祐編勅諸興販斛斗及以柴炭草木博糧食者並免納力勝稅錢注云舊收稅處依舊例即災傷地分雖有舊例亦免本司看詳本路現

今災傷正合施行上條已牒諸州施行仍散榜轄下城
村鄉村外深慮逐處稅務自來收米斛力勝處指為課
額今來雖係災傷合依上條放免至年終比較轉運司
不容如此分說有虧欠折遭責罰須至奏請者

為張嚴州乞免丁錢奏狀

宋

呂祖謙

右臣昨者恭奉聖旨差權發遣嚴州軍州事內竊悚循
以未信之學遽當民社深懼識眊力淺疎濶舛謬仰負
皇帝陛下責成共理之意敬陳悃悞懇辭弗俞黽勉遵

承惶悚無地爰自就道徧訪本州利病往來者皆言嚴
之為郡地瘠民貧丁鹽錢絹額數繁衆民不聊生此賦
不除永無息肩之日臣瞻望威顏之始冒昧控訴天慈
憫惻許令到任條具以聞仰見陛下至仁博臨勤恤民
隱雖古先聖王之用心不是過也臣自到任延問耆老
諮諏僚吏叅稽案籍始知本州丁鹽錢絹為民大害向
來所聞百不一二謹條具本末上千天聽臣照對本州
丁鹽錢絹之數據文開載自承平時每一丁官支給鹽

一斛計五觔每一觔計錢三十一文二分省共計錢一百五十六文省却納絹一丈二尺八寸數內一半係本色絹一半係折納見錢是時絹每一疋直錢一貫文省每丁計納絹六尺四寸計價錢一百六十文省又折帛見錢一百六十文省二項通計三百二十文省將官中所給鹽觔價錢百五十六文省此折外每丁實陪貼納錢百六十四文省所納不多公私兩便未見其害後來蔡京改變鹽法令大商入納買鈔支給袋鹽貨賣從此

官私更不支給丁鹽徒令納絹鹽既停支絹價復長浸
久浸增目今絹一疋估計折納七貫文省民力殫竭職
此之由臣請為陛下詳言之兩浙東西路共管十五州
軍戶口物力無若本州之貧丁鹽錢稅亦無若本州之
重本州地形阻隘絕少曠土山居其八田居其二澗曲
嶺隈淺畦狹隴苗稼疏薄殆如牛毛細民崎嶇力耕勞
瘁雖遇豐稔猶不足食惟恃商旅販販斗斛為命旬日
不雨溪流已涸客船斷絕米價騰湧大小嗷嗷便同凶

年每歲合六縣所納苗米除折納糯米外粳米正管八千七百五十一石猶不及湖秀富民一户所收之數所有官兵米糧逐年婺州應副一萬五千碩補助支遣尚闕一萬三千一十碩其力困乏不言可見重以坊郭鄉村邊溪去處每經巨浸垣牆頽仆廬舍傾摧資用散失生計蕭然若遇盜寇整葺未全復遭漂蕩民素窮乏又加此厄雖使止存兩稅猶懼輸納不前今乃經賦之外每丁使之重納丁錢鹽絹一丈二尺八寸其雙丁以上

折科每足計錢七貫文省凋瘵之民其何以堪且以兩浙諸郡論之平江府秀婺衢等四州自蠲免丁錢明州每丁止納錢六十文足惟湖州丁鹽錢絹在兩浙最號為重其烏程歸安長興安吉德清五縣二丁共納絹一疋本州三丁共納絹三丈八尺四寸比烏程等五縣每三丁共少一尺六寸一丁止少五寸三分三釐相去不遠又武康一縣每四丁共納絹一疋則反輕於本州截長補短本州丁鹽錢絹較之湖州猶自頗重至於他郡

重輕相絕可以類推本州民力在兩浙十五軍州之下而賦歛反在十五軍州之上以至貧之民納至重之賦人情物理恐不應爾臣謹按本州丁籍建德縣第一等至第四等戶計一千八百四十九丁第五等有產稅戶計一萬七千八百九十八丁無產稅戶計三千八百二十丁遂安縣第一等至第四等戶計二千三百三十七丁第五等有產稅戶計八千九百六十四丁無產稅戶計一萬八百八十六丁壽昌縣第一等至四等戶計

九百七十七丁第五等有產稅戶計七千六百三十九
丁無產稅戶計四千二百一十八丁分水縣第一等至
四等戶計五百六丁第五等有產稅戶計一萬三千七
百五丁無產稅戶計九百七十八丁淳安縣第一等至
四等戶計三千六百五十丁第五等有產稅戶計八千
三百三丁無產稅戶計一萬八千二百七十四丁桐廬
縣第一等至四等戶計一千三百九十九丁第五等有
產稅戶計一萬五千四百八十丁無產稅戶計二千一

十八丁通計六縣第一等至四等戶止有一萬七百一十八丁其第五等有產稅戶共管七萬一千四百七十九丁雖名為有產大率所約不過尺寸分釐升合抄勺雖有若無不能自給其無產稅戶共管四萬一百九十丁並無寸土尺椽飢寒轉徙朝不謀夕本州統管一十二萬二千三百九十三丁而第五等有產稅戶共管一十一萬一千六百七十五丁是十分之中九分以上厯瘠困迫無所從出從前官吏明知其苦迫於上司督責

之嚴汗顏落筆感額用刑笞箠縲繫殆無虛日愁嘆之
聲閭里相接强悍者窮塞無聊散為攘竊四方遂指嚴
州為多盜之區非獷俗獨鍾於此土蓋丁錢偏重於家
邦原其情狀實可憐憫臣體訪得深山窮谷至有年三
十餘顏狀老蒼不敢裹頭縣吏恐丁數虧折時復搜括
相驗糾令輸納謂之貌丁民間既無避免之路生子往
往不舉規脫丁口一歲之間嬰孺夭閼不知其幾小民
雖愚豈無父子之愛徒以阨於重賦忍滅天性親相賊

殺傷動和氣悖逆人理莫斯為甚臣聞之不覺涕下竊
自惟念本州實光堯壽聖太上皇帝基命之地陪輔行
都最為密邇皇帝陛下以不忍人之心行不忍人之
政是容輦轂百里之間斯民顛頓愁悴父子不能相保
意者未有以實上聞者臣職在拊摩尚復便文自營不
言死有餘罪用敢竭誠悉意上徹旒宸臣恭覩紹興十
四年十月二十二日勅三省同奉聖旨永道郴州桂陽
監及衡州茶陵縣民戶於二稅之外尚循馬氏舊法添

納丁身錢絹米麥流弊未除朕甚憫之可將遂州縣丁
身錢絹米麥並與除放臣竊惟永道郴州桂陽監茶陵四
郡一縣邈在湖廣太上皇帝明見萬里之外不異遠方
捐賦予民本州幸在闕門之側反不得如遐方荒翳沾
濡德澤臣竊痛之欲望聖慈特降明旨將嚴州丁鹽錢
絹依永道郴州桂陽監衡州茶陵縣及衡婺秀州平江
府例盡行蠲除使一方仰父畜子吏不至門復有生民
之樂不然乞如明州例每丁納錢六十文足又若以國

欽定四庫全書

浙江通志
卷二百六十

十三

用未裕則乞蠲免一半以寬民力亦為厚幸然終不若沛然盡蠲為滂灑無窮之澤也臣誠過慮恐議者或謂蠲免嚴州恐諸郡援例申請必致有虧經費臣竊謂聖人之治俾萬邦惟正之供丁鹽錢絹出於一切本非常賦陛下約已節用凡以為民異時帑藏克溢蠲免之令固將次第而舉今雖調度尚虛猶當先其尤急者用示省賦之漸以地則莫如本州之瘠以民則莫如本州之困以害則莫如本州之重先後之序宜自本州始況太

上皇帝潛龍舊鎮亦非諸州遽敢援例惟願睿斷不疑
俯賜開允俾一邦亟解倒懸之急臣言語短拙不能盡
寫困迫之狀惟與合郡吏民澡心滌慮延頸跂足以俟
鴻龐之施冒犯天威臣無任戰慄悚懼謹錄奏聞伏候
勅旨

申宰執狀

宋王炎

炎緣本州旱蝗之後百姓絕糧烏程歸安德清三縣人
乞賑濟狀已二千九百四十六紙安吉知縣何儒林申

居民多掘野葛長興知縣趙通直申居民多買糟粕炎遣人出烏程歸安鄉村詢訪近碓坊居民多糴糟粕在法減放不及五分雖未當賑濟即與賑濟此如一杯水救車薪之火向望麥熟今又望禾熟日月尚長若更無米接濟弱者必死强者恐為盜災三次申尚書省乞撥和糴米賑糶至今未蒙行下且救荒於百姓已死已為盜之後不若行於未死未為盜之先災所以前後懇切哀告廟堂非是沽名非是市恩非是避罪實以百姓係

國家根本不可坐視窮餓緣此上瀆鈞聽今來事勢已
急本州旋那融官錢糴米分去歸安之郎那鄉烏程移
風崇孝兩鄉及德清武康安吉長興畧減價出糴然每
處不過二三百石若不蒙朝廷行下將和糴米賑濟委
是無米接濟此痛切利害又況出米賑糴收回價錢貯
管在庫秋熟糴還於朝廷無分文之損於窮民有莫大
之惠建隆三年戶部郎中沈義倫嘗言揚泗饑民多死
郡中軍儲尚有百萬可貸至秋乃收粟有司沮之曰來

歲游饑將無所取價義倫曰國家方行仁政自宜感召和氣寧復憂水旱耶太祖悅命淮南發倉廩以賑饑民自祖宗以來勤恤民隱涵養生靈感召和氣累致豐年實由於此如義倫所請春貸秋償太祖尚不以為難今粟米收錢民有利官無所損何憚而不為江淮之民民也嘉興之民民也江淮請錢糴米而得錢不厭其多嘉興請米得米而不拒其求湖州之民亦民也獨屢請而不從災不知其故豈謂災傷減放之少而不與之歟湖

州雖號出米之地苗米僅有百萬不及姑蘇二十分之一於嘉興不及十分之一而戶口繁滋過於他郡所以纔凶歉即便闕失若不賑濟豈特窮困餓死強壯為盜大非祖宗召和氣致豐年之道也不控告於廟堂將安所赴愬州治去行都一宿可至而守臣為民有請如訴於天此災所以終夜徬徨不知措手足之地也不免再具狀申尚書省望鈞慈察災懇切念民之無食狼狽之極乞賜施行以救一郡之命不勝大幸

奏鹽課狀

宋 朱 熹

浙東所管七州而四州瀕海既是產鹽地分而民間食鹽必資客鈔州縣又有空額比較增虧此不便之大者夫產鹽地方距亭場去處近或跬步之間遠亦不踰百里故其私鹽常賤而官鹽常貴利之所在雖有重法不能禁止故販私鹽者百十成羣或用大船裝載巡尉既不能訶州郡亦不能詰反與通同資以自利或乞覓財物或私收稅錢如前日所奏台州一歲所收二萬餘貫

是也以此之故除明越兩州稍通客販粗有課利外台
溫兩州全然不成次第民間公食私鹽客人不復請鈔
至有一場一團累月之間不收一帑不支一帑而官吏
糜費吏卒騷擾有不可勝言者然以有比較之法州縣
恐有殿罰則不免創立鹽鋪抑勒民戶妄作名色抑令
就買出入暗昧不可稽考大畧瘠民以肥吏困農民以
資游手為州縣為提舉主管者非不之知然皆以國計
所資不敢輒有陳說日深月久民愈無聊若不變通恐

成大患臣生長福建竊見本路下四州軍舊行產鹽之法令民隨二稅納產鹽錢而請鹽於官近歲官鹽雖不支給而民間日食私鹽官司既得產鹽稅錢亦不復問其私販雖非正法然實兩便欲乞聖慈特詔本司取會福建路轉運司下四州軍見行產鹽法將本路地里遠近鹽價高低比附參考立為沿海四州鹽法其餘州軍自依舊法施行則亦革弊救民之一事也伏乞聖慈詳酌施行

劄子

與都提舉論災傷賑濟劄子

宋 王十朋

某伏觀今歲風水災傷浙江之東越為最甚上貽宸念
特加賑卹某今有所見條具如後乞賜詳酌施行一本
府有紹興二十七年以前積欠稅租數目非一今歲不
登一年常賦猶無以輸積歲逋負何從而出欲乞敷奏
朝廷將積欠稅租權行停閣俟來歲有秋仍舊輸納庶
一郡生靈均被大惠一切見本府訟牒私債居多其間

不實者半蓋受理之門既啟虛妄之訴遂興所負無幾
為費不貲至有賂胥吏以買直者今凶荒救死不贍若
加以私債民之流亡餓蹠者必多欲乞數奏朝廷一應
新舊私債不問多寡並放一年官司不得受理俟豐稔
盡償庶貧民不致重困一災傷去處蒙聖恩將義倉賑
濟某慮諸邑人戶有逃移於未獲旨之前不知有賑卹
之恩者或為奴婢或為乞丐或為鼠竊殊可矜憫欲乞
台慈委諸令佐廣行告諭招其復業如家計已破仍重

加拯救無致失所以體聖主勤卹之意一風潮所壞海塘如前日上虞縣陳請之類依法合以食利人戶修築今濱海之民既被災傷富者困貧者饑況工役廣大必難取辦若役他鄉又不能無怨欲乞台慈委自令佐或以官米或勸富民隨多寡出穀或米日給升斗以雇之方艱食之秋民幸於得食不憚出力就役如是則修築之功不日可就

定奪餘姚縣和買劄子

宋王十朋

轉運司判下餘姚縣百姓魏臯等狀理本縣和買不均之弊某等索到所具和買一一詳看其餘姚所有不均緣本縣以第一等至第四等和買而第五等不科物力及三十八貫五百文者為第四等三十八貫四百九十文者為第五等由是狡猾人戶與鄉胥相比詭名隱寄下等自經界至今方及十年物力走弄已及一半自今所管物力比經界後其上四等戶減退八萬餘貫流入第五等戶其上戶所科和買比舊每匹增八尺以上

上戶加少而和買日增下戶加多而和買不及非昔日
人戶多富今日人戶頓貧其弊實起於規免敷料多端
隱稅法令雖嚴不能禁遏詞訴之興蓋由於此切覩紹
興十三年指揮比年上戶規逃物力往往折為下戶高
者既降下者遂升今後自一等至五等均敷以絕增減
之弊又覩十五年戶部劄子欲從第一等至第四等科
敷以優恤下戶又云州縣逐處事體不同有以物力及
百貫以上為等五等者有以十貫以下為第五等如此

令第四等以上科數物力少處實受其利物力多處併在四等却成偏重欲下轉運司令州縣相度隨宜措置科折其等切見會稽山陰諸暨餘姚四縣和買遵十五年指揮止科四等下户不科嵯縣新昌蕭山上虞和買遵十三年指揮並科下户內新昌嵯縣以物力十五貫以下上虞以二十貫以上蕭山以三十貫以上今餘姚所理和買不均及詭名減户之弊除欲以田畝科不可施行外欲乞准十五年指揮隨宜措置於新昌上虞四

縣中斟酌高下用二十貫以上和買庶得其中既有外
縣已行之例又合相度隨宜之法物力三十八貫五百
以下實多詭戶其弊可革二十貫以下者實係貧民不
害優卹更合取自指揮施行

頌

於越九頌并序

宋 諸葛興

興世家會稽俯仰巖壑惟禹陵所在自少康建祠今
數千載比年時和歲豐邦人奉祀弗懈益虔因感昔

人九歌之作自禹暨嗣君二相與夫英霸賢牧高人
孝女顯有祠宇者輒為九頌效顰前作念昔楚騷之
興蓋出於感憤而繼以規諷後之模仿者如九詠九
愁之類往往皆然興方蹈詠明時又其意主乎景仰
先哲固無所謂感諷也直曰頌云爾獨妄論古人不
能不發為一二而其歌吟嗟歎因寓之以擬騷之聲
云

瞻越山兮鏡之中鬱喬木兮岑叢倚青霞兮窈石枕碧

流兮寶宮端黻冕兮穆穆列俎豆兮雍雍梅為梁兮挾
風雨修而來兮修而去芝產殿兮間見橘垂庭兮猶古
壁騰輝兮珪薦瑞書金簡兮緘石匱朝萬玉兮可想探
靈文兮何為嗟洛水兮橫流民昏墊兮隱憂運大智兮
無事錫洪範兮敘疇身勞兮五嶽迹書兮九州亶王心
兮不矜迄大海兮歌謳猗聖宋兮中興駐翠蹕兮稽城
獨懷勤兮曠代燦奎文兮日星揚舲兮拊鼓吳歆兮鄭
舞奠桂酒兮蘭肴庶幾髣髴兮菲食卑宮之遺矩

右大禹陵

肇三聖兮傳一中建太極兮參洪濛元圭錫兮汝績昭
華歸兮汝躬大道公兮均禪繼家天下兮繇姒氏嵩石
兮發祥謳歌兮與子誓甘野兮服叛養國老兮貴齒席
不重兮味不貳琴瑟屏兮鐘鼓置思皇訓兮克儉必敬
承兮敢墜祀四百兮綿景祚兆大橫兮垂異世越山兮
蜿蜒鏡水兮漪漣煥祠宮兮屹峙肅廡祀兮愉然端冕
兮龍章執圭兮琳琅想規重兮矩疊恍韶奏兮鏗鏘

右嗣王祠

披竹簡兮典謨聖手斷兮唐虞登羣龍兮輔翼萃一堂
兮都俞知人兮帝之哲動天兮帝之德畫像兮民不犯
舞千兮苗已格迨一旅兮中興嚴廟貌兮稽陵感會遇
兮風雲崇像飾兮股肱憤夷楚兮陵上國忽庭堅兮祀
俄息泚麟筆兮特書喟夷吾兮有力何汲汲兮詭誕謂
明良兮相賊姦雄託兮自焚慨齊東兮毋惑仰而觀焉
興禮秩俯而察焉草木植功之遠兮難名民之思兮無

數

右二相祠

睇禹陵兮歸然遽珍館兮螭蛸敞別室兮遺像崇英霸
兮千年諗越民兮非黷祀推世家兮自遷史肇無餘兮
開國傳後裔兮奮起痛夫椒兮深衄同國人兮勞欲采
蕝兮食何味嘗腴兮志彌篤封以內兮種所司閭以外
兮蠡所知羗厲志兮澡恥迄乘時兮決機盟上國兮王
致昨按山南兮恢土宇陟鑑臺兮睨東海矩天門兮模

地戶惜規圖兮不弘幾弓藏兮犬烹蹇七術兮遺恨悵
五湖兮遐征尚蟬嫣兮以復續終與享於鼻祖之庭

右越王廟

書畀如兮力溝洫民奠居兮勤稼穡降羸劉兮言水利
嘉鄴渠兮夸鄭國慨元光兮瓠子決彼劒封兮河之北
悼一言兮貽時害諉天事兮非人力昔越守兮得賢侯
慮遠久兮為民謀鏡一湖兮陂萬頃備潄泄兮歲有秋
寧殺身兮利人抑洙泗兮稱仁嗟後來兮私已田吾湖

兮寢堙湖之復兮疇繼侯之心兮萬世酌清流兮擷蘭
芷奉明薦兮非昵祀

右馬太守廟

典午西兮金谷輩渡而東兮藹多士嘉內史兮屏浮華
淡物累兮頤天粹升冶城兮遐想友東山兮雅志修袂
事兮蘭亭觴曲水兮羣英追雩風兮涵泳渺萬化兮均
平紀清遊兮感慨剡形忘兮神詣蔚翔鳳兮一札寶連
城兮千祀太傅起兮為蒼生扶晉鼎兮躋苻秦內史歸

兮樂山水師萬石兮飭孫子出與處兮兩賢意易地兮
皆然

右王右軍祠

山簇簇兮環湖水淅淅兮縈紆人何遊兮明鏡鳥何飛
兮畫圖懷賀老兮今昔想逸致兮林廬老之襟兮天濶
老之神兮秋月飛翰兮龍鸞吐詞兮冰雪際照運兮開
元司繹典兮春官凌玉霄兮倚華蓋驂鸞馭兮升西崑
俄清夢兮綿綿恍乘雲兮登仙覲玉皇兮紫宸聆九奏

兮鈞天賤天公兮遂志鼓干柷兮錦里吾朋兮鷗鷺吾
賓兮煙水野服兮翩躚仙衣兮娛戲緬高賢兮非苟於
去就庶幾兮東門之傳鳴夷之子

右賀監祠

虬髯起兮龍翔耀兵威兮八方法羽林兮嚴禁衛握鉤
陳兮掃欃槍視諸將兮噲等伍咨舊臣兮忠且武聳萬
目兮矩矱衛九重兮心膂維東南兮都會辱吾王兮鎮
撫暢威惠兮千載隕福祥兮茲土瞻宸服兮煌煌薦蕙

有兮葵觴匪震懾兮羅池宣愛思兮桐鄉王之澤兮流
後裔更累葉兮奮忠義孰旌表兮陪廟祀顯一門兮厲斯世
右城隍龐王廟

悄叢祠兮江之湄懷予心兮肅祇表孝行兮尚之祀垂
妙辭兮淳之碑嗟窈窕兮踐天性一念烈兮萬古鏡山
眉兮蒼蒼江練兮茫茫江之水兮可竭娥之靈兮不可
歇

右曹娥廟

蘇州嘉興屯田紀績頌并序

唐李翰

禹平九土溝洫之功大棄粒蒸人稼穡之務重自古有國家未嘗不率由斯道底慎其業故登平足以厚生殖禍難足以定凶災未有易此而能理者自羯羗亂常天步多艱兵連不解十有四年因之以饑饉重之以矢札死者暴露亡者情遊編版之戶三耗其二歸耕之人百無其一將多於官吏卒衆於農人古者八家為鄰一家從軍七家從之猶曰興師十萬內外騷動不得操農桑

者七十萬家今乃以一夫家食一伍一餘子衣一卒師將不立人將不堪此聖上所以旰食宵興求古今令典可以濟斯難者莫出乎屯田廣德初乃命相國元公倡其謨分命諸道節度觀察都團練使統其事擇封內閒田荒壤人所不耕者為其屯求天下良材善政以食為首者掌其務屯有都知羣士為之都知有治即邑為之官府官府既建吏胥備設田有官官有徒野有夫夫有任上下相維如郡縣吉凶相卹如鄉黨有誅賞之政馭

其衆有教令之法頒於時此其所以為屯也雖天子命之股肱贊之至於宣上命齊下力經地域制地事辨土宜均土法簡穡器修稼政陳三壤之種而敬其始考九農之要而成其終則都知之職專達其事焉詎可以非其人哉浙西觀察都團練使御史中丞兼吳郡守王公經國大賢憂公如家慎擇厥官以對明命浙西有三屯嘉禾為之大乃以大理評事朱自勉主之且揚州在九州之地最廣全吳在揚州之域最大嘉禾在全吳之壤

最腴故嘉禾一穰江淮為之康嘉禾一歉江淮為之儉
公首選於衆獨當其任有寬簡惠和之德知艱難勤儉
之事政達乎本智通乎時仁愛足以結下機權足以成
務嘉禾大田二十七屯廣輸曲折千有餘里公畫為封
疆屬於海濬其畎澮達於川求遂氏治野之法修稻人
稼澤之政芟以殄草剔以除木風以布種土以附根頒
其法也冬耕春種夏耘秋穫朝廷夕課日考旬會趨其
時也勤者勞之惰者勗之合耦助之移田救之宣其力

也下稽功事達之於上上制祿食復之於下敘其勞也至若義感於內誠動於中徇國忘家恤人猶已野次露宿簞食瓢漿盡四體之勤趨一時之役大寒栗烈而猶執鼗鼓盛暑赫曦而不傳車蓋如登高去梯與之死生投醪均味忘其飢渴然後知仁義之政必見於耕穫井田之法可施於甲兵夫如是人將竭其力地將盡其利天將與其時自贊皇為郡無凶年自朱公為屯無下歲元年冬收入若干斛數與浙西六州租稅埒朝嘉厥庸

授廷尉評公又稽氣授時如前代法有白雀集於高豐
屯廩蓋大穰之徵也屯官某乙等聚而稱曰初公為屯
人有二懼焉邑人懼其暴屯人懼其擾今溝封大牙而
不相侵疆場日履而人不知方舟而上以饋師旅此功
及於國也登量而入以寬征稅此德加於人也古者智
效一官政修一鄉猶歌之詠之手之足之況朱公之績
如此其大者乎遂相與斲琬琰表阡陌南陽太守豈專
刻石之功桐鄉嗇夫終踐大農之位其辭曰茫茫九區

陽九躔災邱荒札瘥田卒污萊天步未移連師滿野不
耕不獲仰食於下嗷嗷遺人餬口饋軍帝曰予憂爰立
其屯且戰且耕古之善經辟師肅祇王命是聽嘉禾之
田際海茫茫取彼榛荒畫為封疆朱公涖之展器授方
田事既飭黎人則康我屯之稼如雲漠漠夫位基布溝
封綺錯朱公履之勸耨趨獲稂莠不生螟螣不作歲登
億計征寬稅薄息我蒸人遂其耕鑿我屯之庾如京如
坻嘉量是登方舟是維贊皇獻之達於京師飽我六軍

肅將天威畎距於溝溝達於川故道既堙變將為田朱
公濬之執用以先浩浩其流乃與湖連上則有塗中亦
有船旱則溉之水則泄焉曰雨曰霽以溝為天俾我公
私永無饑年公田翼翼私田薿薿不侵其畔不犯其穡
我倉既盈爾廩維億屯人熙熙邑人怡怡不擾其務不
干其時我無爾暴爾無我欺我有官屬朱公訓之我有
徒侶朱公恤之我有衆役朱公率之我有徵功朱公序
之起於田中印綬纍纍何以況之福祿如茨何以久之刻

篆於碑

國朝

御書大字蘭亭頌

并序

朱彝尊

臣聞邃古之初首傳羲畫結繩而後丕煥堯文河
則龍筴告期山則螺書徧刻禹功甫奏爰題岫嶠
之碑周道方興厥有岐陽之鼓寫晉祠之記樹碣
修廊磨岱宗之崖琢銘絕壁頒鏤文之紅管賜飛
白於玉堂間有工書莫由造極我

皇上日新盛德天縱多能四海同文治軼唐虞之上
萬幾餘暇心游翰墨之中

睿藻光華曜六文而首出

奎章景鑠包八體以高騫翠珉表闕里之庭銀榜徧名
山之字允矣帝王第一卓哉今古無雙蓋自蒼頡

沮誦以來洎乎鍾繇張芝而外六郤三謝非無典
午名流一字萬殊祇有會稽內史冠書家而獨立
集字學之大成永和九年暮春三月循洛師之舊

典會江左之羣賢列坐流觴暢幽情於禊事興酣
落筆傳醉本之蘭亭逮至再書終焉莫及賺來御
火宜酬金縷之鉞攜自率更足比支機之石馮湯
趙葛各有臨摹褚薛顏楊終難髣髴且偏旁之互
異或肥瘦之失中要皆徑寸之書罕覩非常之蹟
皇上御帝鴻之墨海揆漢殿之璇跗用襲宮箋

特書禊序作擘窠之字悉中準繩揮垂露之毫不踰規
矩得心應手入化窮神雖曰臨書實超真蹟昔桑

世昌著錄四十五家考陶宗儀所陳百七十本自

瞻

御墨盡在下風使右軍更生亦當閣筆假常侍而在難
免登牀爰遴畫省之員俾刻崇山之麓光同五緯
麗並三辰於是相彼名區斲林屋青瓊之版載來
巨浸駕吳江赤馬之船神魚吹浪以通波健爆服
襄而轉轂遂歷樵風之境誕經雲壤之村鈎摹不
爽夫纖微鐫勒無差乎齒髮陰之華棟承以豐趺

庇厥良材用新古蹟文石之牆百堵融邱之土再
成看修竹之池臺喬雲長護勝鴻都之車馬遐壤來
觀臣近矚榮光欣逢盛際對昭回之雲漢儼咫尺之
天顏敬綴蕪辭用揚懿美頌曰

聖矣我

后萬幾惟勤一有餘暇翰墨必親廼握乾符廼闡坤珍
倬彼雲漢麗矣星辰金壺墨藪靡書不甄謂晉禊
序遺法可循手追心慕入妙通神拓為大字天矩

一新螭盤虎踞鳳翥龍伸爰即勝地勒以豐珉鵞
墨之沼浮沫成淪有丹有獲有猗有陳有荃有蕙
有松有筠有蘋有藻有羽有鱗有赫

宸書鎮茲海垠三光轆轤七采璘彬吉雲環衛元氣彌
綸如稽山壽於千萬春

記

桐柏山金庭觀記

梁沈約

若夫上元奧遠言象斯絕金簡玉字之書元霜絳雪之

寶俗士不能仰窺學徒不敢輕眇非天稟上材未易可
擬自惟凡劣識覽鮮窮早向幽遐蠲棄情累留愛林壑
託分鳥魚既遠出天台定居茲嶺所居之山實惟桐柏
仰出星河上參倒景高崖萬仞邃澗千迴翹心屬念晚
臥晨起採三芝而延佇飛九丹而宴息乘鳧輕舉留鳥
忘歸銘曰日為車馬芝成宮觀虹旌拂月龍輶漸漢萬
春方華千齡始旦

妙喜寺碑記畧

唐
顏真卿

州西南杼山之陽有妙喜寺梁武帝之所置也大同七年夏五月帝御壽光閣會所司奏請置額帝以東方有妙喜佛國因以名之舊置在今州西金力山有唐太宗文皇帝升極之六年春二月移於此山山高三百尺周回一千四百步蓋昔夏杼南迹之所今山有夏王村西北有夏駕山皆后杼所幸之地也晉吳興太守張元之吳興疏云烏程有墟名東張地形高爽山阜四周即此山也亭前二十步跨澗有黃浦橋橋南五十步又有黃

浦亭並宋鮑昭送盛侍郎及庾中郎賦詩之所其水自
杼山西南五里黃蘗山出故號黃浦俗亦名黃蘗澗梁
光祿卿江淹賦詩之所亭東偏有招隱院其前堂西厦
謂之溫閣從草堂東南屈曲有懸巖徑行百步至吳興
太守何楷釣臺西北五十步至避它城大厯七年真卿
蒙刺是邦時浙西觀察判官殿中侍御史袁君高巡部
至州會於此山遂立亭於東南陸處士羽以癸丑冬十
月癸卯朔二十一日癸丑建因名之曰三癸亭西北於

叢桂之間創桂棚左右數百步有芳林茂樹悉產丹青
紫三桂而華葉異各樹桂之下有支徑以袁君步馬因
呼為御史徑

白蘋亭記

唐
李直方

新作白蘋亭書時且志政也梁太守柳惲賦詩於始因
以名洲今邦伯李公成室於終茲用目亭度乎事則位
均考乎地則境同合美配德古今相望亭之時義至矣
吳江之南震澤之陰曰湖州幅員千里綦布九邑卞山

欽定四庫全書

卷二百六十

屈盤而為之鎮五谿叢流以道其氣其土沃其候清其
人壽其風信實公之始至也用公寬明恕以懷之敬事
賞罰以勸之賦令之先必度其物宜而咨於前訓故居
者逸亡者旋或蹈境而留或聆聲而遷提封之內無榛
灌繩墨之下無姦傲既而外邑多材郡不能潔公命懸
諸善價俾代常徭於是乎幽巖之巨木斯出積歲之逋
租必入公家受其利山氓蒙其惠繇是白蘋之制經矣
洲在郡城南東亂雲溪而即焉白沙如浮流波環之前

有大野綿雲繚以萬峯後有名都壓水駢以千室邑居
可望而喧埃不及空水交映而雲天在下造物之工若
有私於是焉芟菰叢生鳬鶴朋游嘉名雖曜清境或棄
公於是相顯爽之宜立卑高之程據洲之陽揆日之正
揭大亭一焉修廕雙注北距於霅浮軒中流峩小亭二
焉大可以施筵席小可以容宴豆凡棟宇之法輪奐之
美銛刮密石用成翬飛施宏壯而有度備形紫而不踰
內則庭除朗潔彌望鋪雪曲沼逶迤以中貫飛梁夭矯

而對起紫桂翠篁辛夷木蘭碧枚丹竇蛇走珠綴鮮飈
暗起繁葉振蕖落英飄飄灑空浮水天目神池之上多
不名之卉洞庭水府之下產怪狀之石嶙峋乎玉容歲
蕤乎瑤芳衆榮偶植羅列布護外則差砌宜以白蘋間
之紅蓼川與天遠百里如組邦君之來肅肅旆旌綵舟
徐移魚躍鳥鳴亭成之日三吳之賢大夫集焉公用鼓
鐘羽籥以落之然後使臣之臨重客之來獲游是者悅
乎有遺區之歎則為邦之成績作亭之良規參合二美

游揚四海坐馳而逝與殿置偕矧蘋之為用風有季女
之莫騷有放臣之望夫以澗谿之賤微而可充王公之
殷薦是故君子重之今扶贊勝賞也如彼哲賢咏歌也
如此則是亭憑眺之外又有傳經之道焉若乃乘農隙
之暇時購武夫之美功廛閭不煩財用不屈揚昔人之
休烈垂不朽之遐觀咨其創物之智有以加人不如是
烏能及此已卯歲冬十月予將浮浙河上會稽凌縉雲
觀赤城道出公之仁宇目覽亭之崇備舉書其實合春

秋傳信之經後之人無視十洲孟浪之說而沒其誼云

杭州刺史廳壁記

唐李華

唐虞之代四岳十二牧分掌諸侯宗周有方伯連帥之職秦有監郡漢魏以還初曰部刺史後曰州牧近代罷州牧復為郡太守太守刺史無恒其稱職同九卿假以符節雖親如魯衛貴若周召任切安人往往除拜天寶中朝廷以尚書郎人物之高選二千石治元元之性命始以省郎臨大部若密邇京師或控壓衝會萬商所聚

百貨所殖將擇良吏重難之杭州東南名郡後漢分會稽為吳郡錢唐屬隋平陳置此州咽喉吳越勢雄江海國家阜成兆人口日益增領九縣所臨蒞者多當時名公宋丞相劉僕射崔尚書訢謨大政其間劉尚書裴給事之盛德遠業魏左丞蘇吏部之公望遺愛在人韋太原崔河南劉右丞侯中丞節制方隅有事已來承制權假以相國元公旬朔之間生人受賜由是望甲餘州名士良將遞臨此部況郊海門池浙江三山動搖於掌

端靈濤歟激於城下水牽卉服陸控山夷駢檣二十里
開肆三萬室近歲災沴繁興寇盜連起百戰之後城池
獨存王師雷動元惡授首乳哺疲人分命賢哲詔以兵
部郎中范陽盧公幼平為之公體仁而清直方簡亮文
以輔德武以靜人澄況有清江之姿巍峩有秋山之狀
麾幢戾止未逾三月降者還忠義歸者喜生育旌次讓
利轅門無聲人咸曰休哉以卿佐之才遵王澤敷德政
吾見其為公為侯福履宜之未見其極也刺史冠服印

綬甲令載之故不書詞尚體要古史之遺也永泰元年七月二十五日記

衢州刺史廳壁記

唐

李華

有漢已還州統郡郡或連十城州或部十郡江南多大郡如會稽丹陽鎮領遐濶分置部都尉自富春而南太末一縣抵於建安今此州即古會稽西部之地也雖官明史修如曠阻何厥後相因損益無恒時更亂離罷置紛糝聖朝字育元元納於大中自衛公累單于英公滅

句麗天下和平戶口繁衍元聖溥行葦蓼蕭之澤於下
廷延公卿議割州邑謂疆與府近則易為理人與吏親
則易為安以婺州封畛為廣分置衢州領六縣猶為大
郡近歲析玉山全邑洎須江南鄉益信州而不為寡去
年江湖不登茲境稍穰故浙右流離多就遺棄凡增萬
餘室而不為衆吳越地卑而此方高厚居者無疾人斯
永年名山大川既麗且清俗尚文學有古遺風國朝不
以州領郡郡與州更相為號遷復從宜事之當也置觀

察之司而董臨之此州長吏之選甲於他部忠貞之老
則武威公李僕射傑親賢之望則信安郡王禕遺政行
為故事名位光於屋壁開元天寶中始以尚書郎超拜
名郡賀蘭大夫為之李郎中為之自逆酋悖天地之慈
犯雷霆之誅賀蘭起北海之師郎中佐浙東之幕有文
有武家頌戶歌元惡天討餘凶稔罪聖恩示以鈇鉞之
威未即大刑以為不教人戰是謂棄之乃分諸州置節
度以鎮之州有防禦軍刺史為之使俾與夫持節某州

諸軍事名實副焉以此州密邇山陰爰隸浙東廳事憑
高戟戶臨江文武左右麾幢成列千夫長百夫長上察
郡掾屬邑官吏進退無聲趨拜風生仕不登州談不為
榮凡為州者儒不毅勇則頓威攻守所由敗也勇不儒
和則失人邦國所由困也故二千石之任方今為難至
尊垂憂勤於兆人延俊乂於高位以蘇州刺史陳郡殷
公文可以成政武可以安人明斷良謀忠在王室其理
也寬不容急嚴不拒情清白貫於神明簡易契於黃老

德必有隣歌聲宜繼由是命公典此邦也至若建置城府之年月升降品第之等差風俗貢賦之宜男女提封之數圖牒備矣老幼傳之今之所書畧舉勲德也元年建寅月二十一日左補闕趙郡李華於江州附述

許氏吳興溪亭記

唐權德輿

溪亭者何在吳興東部主人許氏所由作也亭制約而雅溪流安以清是二者相為用而主人盡有之其智可知也夸目夸心者或大其開闢文其節稅儉士恥之絕

世離俗者或梯構巖巘紉結蘿薜世教鄙之曷若此亭
與人寰不相遠而勝境自至青蒼在目潺湲激砌晴烟
映嵐明晦萬狀鷗飛魚游不驚不喁時時歸雲來冒茆
洞許氏方岸鶚冠支筇竹目送溪鳥口吟招隱則神機
自生利欲自薄百骸六藏之內累無自而入焉有田二
頃傳於亭下鉉基之功出於僮指每露蟬一聲秋稼成
實倚杖眺遠不覺日暮歲食之美則以給尊中方其引
滿陶然心與境冥則是非得喪相與奔北之不暇又何

可汨於胸中噦夫舉世狗物以失性而不能自適且繆
戾於動靜之理君之動也代耕筮仕必於山水之鄉故
尉義興贊武康皆有嘉聞而無秕政其靜也則偃曝於
斯亭循分食力不矯不躁庸詎知今日善閑不為異時
之大來耶予知之深故因斯亭以廣其詞云

湖州刺史廳壁記

唐
顧況

江表大郡吳興為一夏屬揚州秦屬會稽漢屬吳郡吳
為吳興郡其野星紀其藪具區其貢橘柚織縞茶紵其

英靈所誕山澤所通舟車所會物土所產雄於楚越雖
臨淄之富不若也其冠簪之盛漢晉以來敵天下三分
之一其刺史沿革不同或稱太守或稱內史或稱都督
他州或否如魯史晉乘侯牧一也其鴻名大德在晉則
顧府君秘秘子衆陸玩陸納謝安謝萬王羲之坦之獻
之在宋則謝莊張永褚彥回在齊則王僧虔在梁則柳
惔張謏在陳則吳明徹在隋則李德林國朝則周擇從
令聞也顏魯公忠烈也袁給事高謹正也劉員外全白

文翰也洎于頃大夫作塘貯水溉田三千頃今使君辭也唐景皇帝七代之孫先公尚書先公大夫奕葉之勲有功於民公實嗣之孔惺銘鼎天下重器天王褒拔于公襄陽節度李公陟當道觀察統諸道鹽鐵轉運二牧既陟惟公盤桓鴻鵠不飛飛即摩漢其逋者復其危者安其憂者泰所謂善輯於是拓郭糴萊就便除害政之餘力作消暑樓於南端復亭署於白蘋洲聿興廢土光明敞豁湧出谿谷其舊記吏部李侍郎紆撰其圖經竟

陵陸鴻漸撰使君命況總兩家之說俶落晉宋訖於我
唐凡一百九十七人及歷代良二千石儀形畧也鋪張
屋壁設作存勸竦神告民春秋不朽之義也貞元十有
五年十二月哉生魄華陽山人顧況述

嘉興監記

唐
顧況

正德利用阜財足食國之本也天寶末天下兵起乾元
初上司奏議宜以鹽鐵之職總以社稷之臣幹乎山海
之利以富人也淮海閩洛其監十焉嘉興為首朝廷以

是蠲貸恒賦實乎大內大臣奉法為事選人拔其賢幹
昇於憲署以宣原隰光華之寵趨其署者如好鳥之棲
茂林相國劉公嘗以大監小州不相若也故其職員不
忝乎爵秩其刀布必倍於租入渤海高君日倫世以勲
烈緩步濶視胷襟洞開中有方畧不循進級故一廷評
於茲二紀傾酒定交擲金市義不餌不仁之粟前使張
侍郎滂王尚書緯總其卜式弘羊之計遂有採山煮海
之役十年六監興課特優至是末期從百萬至三百萬

鹽人賈人各得其所故端介之節風采自高繼夫漕運
波委陸溢此天下之利器也可示人乎夫以步光莫邪
切玉如泥剗鐘無聲不以一割均其銛鈍君子以知人
則哲無德不酬鴻飛九霄驥騁千里前秘書省著作佐
郎顧況美使臣之得人貞元十七年歲在辛巳正月朔
記

括郡廳壁記

唐
韋紆

處州浙江東南七百里連山洞溪負海踰嶠綿歷更

置至隋始為處州後復號括國朝置十道處州列在江南第居於上天寶初為縉雲郡大厯末復之刺史更置迭廢州郡沿革官則隨之大凡親人輔化任莫重焉太和五年紆以司駕員外郎奉符典州大懼不稱其職且以地險而瘠人貧而勞繭絲之稅重倍他郡故逢穰歲亦未若他郡之平年也為是邦者得不謹節而乃自封乎夫惟惻隱可以安疲羸忠信可以美風俗待物以誠飲人以和可以去刑法矣是三者紆未之逮而有志焉

欽定四庫全書

卷二百六十

因書之壁以自儆

烏程縣修建廨宇記

唐楊夔

叔孫昭子聘於晉晉受邾人之慝執昭子寘於箕使吏
藩之昭子不以拘為意止之舍有壞必葺去之如始至
故春秋賢之今有受九重之命牧其民公館摧圯視而
不治者無乃取議於君子乎丹陽余公蟾再尹於烏程
降車之春察訟決獄之暇周視縣署其門傾其廳欹其
墻圯其廡偃頽簷側楹倒移相倚風雨罔庇公歎曰建

之者何人壞之者何心既叻守邑其敢不力自慙以圖
嗣修乎然屬天未悔亂兵火猶熾專城而居者其可無
備乎故儲軍數萬以戒不虞而軍須軍餼僉賦於縣務
繁力匱久莫克舉公乃宵分而寢五鼓而興行忖坐維
不遑所安近越於時方克倬功於是節冗費之用資贖
辟之金僦力於農休徵工以厚償聽斷之餘策杖以巡
慰其勞者勗其惰者設茗及餐日有省視於是工操斧
斤如蟻集臙傭運其材如水赴泝財以儉而蘊故其用

給人以悅而使故其功倍不期年而衆宇鼎新若換大
門中門修大廳小廳東閣西閣新押司錄事院建人吏
祇候房砌縣之外城凡百餘雉創宅之周垣近一百堵
修衆僚之宅五造廳庫之橋六疏西亭之汙池製公廳
之什器其尤赫赫者如每歲徵賦主胥類於廳之西廡
以其輸賦駢湊滿逸是虞乃增廡之一楹構欄以限其
內外俾永絕罔耗此以見公謀之經久也縣之西北隅
舊有帳院蓋鄉史團集里書之所歲月綿遠損壞無幾

每遇霖潦則束席就燥以避其沾濕亦有時矣加以往來奔走泥濘之患舉邑是病無從可革公於是歷揆其損以籌完葺正傾支摧增新易壞復建修廊以抵於都門雨有依暑有蔭從役者不知其勞矣此以見公情之恤下也公帑摧敗上漏下濕周垣雖設局不為固易所謂慢藏而誨盜也公乃擇堅以革枯選宏而化陋厚厥垣嚴厥關此以見公志之防閑也縣之圜扉頽危莫甚彼犯大辟得繫者豺狼野心脫走是務閑闔不謹垣牆

不慎是遺肉於虎吻也且糞壤狼穢戾其矜恤之意公乃剗積弊滌宿汙席以潔其榻食以茹其餒此公之處心慮物也先是縣之秋曹掾蘇頌釋褐之官也始至兼戎曹遇上巳節郡有角楸之戲郡守出觀則司戎者職其事因乘小艇往來檢馭郡治之南溪波浩洋而舟覆焉衆駭愕謂不可援俄聞空中有言曰無損蘇公忽有翰流以出其舟蘇公存焉俗稱其地為蘇公潭大厯中縣令李晤故相李紳之父也相國誕於縣署幼弄之歲

墜於縣之東池逾數刻忽若有物翼者出於池而相國
畧不為苦二者皆縣之故事而圖經不載公乃檄請邑
人太學博士丘光庭輯遺事始著於籍於是盡列其狀
請言於弘農楊夔夔學春秋固當以紀功書績為事公
前任日崇修先聖之祠為文讚功刻石於縣今復紀此
弘烈蓋以慰縣人之思也況公以民吏之勤請不可拒
絕由是採石勒之乾寧丙辰七月記

修東亭記

唐楊夔

故相國趙郡李公紳寶歷中廉問會稽日以吳興僧大
光有神異之迹為碑文托郡守敬公建立於弁山法華
寺會昌中詔毀佛寺此寺隨廢時縣令李式見碑述相
國先人曾宰烏程遂移立於縣之東亭迄今五十載其
碑毀折汝南周生以明經四命重宰烏程覩其廢逸遂
求於故老獲舊文比類於折碑所失者數字因重刻於
石所缺文字不敢臆續蓋所以避不敏遵宣聖不知而
作之戒也兼其舊傳云東亭之池始相國誕於縣署學

弄之歲乳母情於保持俾相國墜於池人莫之覺食頃
如有物翼出於池面家人方得拯焉衆方懾駭而相國
笑語無替於平日人咸異焉初有石數尺勒其事歲月
綿遠石失其處故汝南生廣其亭濬其池再刻其碑重
序厥繇蓋欲存縣之故事也生中和初宰此邑及期而
代居閒閉關澹薄自得郡帥隴西公潛使人伺其所為
知其安於貧樂於道閱百代以自娛未嘗以缺乏為撓
由是官有乏必俾承之而生所至以靜理聞癸丑夏復

詔生宰烏程民吏忻忻再偶寬政閣鞭聽訟事簡庭閒
君子哉汝南學古入仕有其經矣生家於陽羨數世以
明經獲祿羣從昆弟並一舉而捷凡浙右之士因以嚮
風國庠聞其名咸推先焉夫善為政者雖於人安而俗
阜必當於事有立於意不忘以羽翼厥道也今徭賦既
調風俗既安逋逸有歸慙子有依然後搜遺文刊墜碑
此以見興廢之心也建新亭疏汙池此以見繼絕之志
也於乎當大兵之後民厭於煩役克俾其民康其務無

媿於令長矣生既立大光上人之碑遂命夔記其年月別立於石且以旌斯亭之興有自也

清白堂記

宋 范仲淹

會稽府署據卧龍山之南足北上有蓬萊閣閣之西有涼堂堂之西有巖焉巖之下有地方數丈密蔓深叢莽然就荒一日命役徒闢之中獲廢井即呼工出其泥滓觀其好惡曰嘉泉擇高年吏問廢之由不知也乃扃而澄之三日而後汲視其泉清而白色味之甚甘淵然丈

餘綆不可竭當大暑時飲之若餌白雪咀輕冰凜如也
當嚴冬時若遇愛日得陽春溫如也其或雨作雲蒸醇
醇而渾蓋山澤通氣應於名源矣又引嘉賓以建溪日
鑄卧龍雲門之茗試之則甘液華滋悅人襟靈觀夫大
易之象初則井道未通泥而不食弗治也終則井道大
成收而弗幕有功也其斯之謂乎又曰井德之地蓋言
所守不遷矣井以辨義蓋言所施不私矣聖人畫井之
象以明君子之道焉予愛其清白而有德義為官師之

規因署其堂曰清白堂又構亭於其側曰清白亭庶幾
居斯堂登斯亭而無忝其名哉寶元二年月日記

湖學田記畧

宋 顧 臨

吳興學著於天下當其盛時學者不可勝錄然常患惠
而養之者不至也初得賜田五頃而瀕湖多潦歲入無
幾嘉祐中臨嘗承乏教授計其資十常不能及二三既
數年廼會太守鮑侯軻恤其不給慨然思有以廣其資
方謀諸士僚適聞秀州杉楊涇有民訟田頻年不決官

將兩奪之鮑侯廼用書請轉運使願得貸錢購所爭田以贍學者會轉運使賢樂聞其請遂用貸錢六十萬得田七頃其田當沃壤舊無曠潦之患以二年之入償貸錢然後率為學糧歲可以食百員夫棟宇之固易壞也泉布之富易耗也惟田之息可以需及無涯語其始可謂惠而不費者也要其終可謂養而不窮者也

湖鎮舍利寺塔記

宋趙抃

夫源已深日加浚根已固日加培彼培浚千萬人一二

人焉將堙築拔絕俾派涸枝槁閉室顛踣吾不識其為
可也浮屠寺法始漢明帝時入中國熒熒乎魏晉煌煌
乎宋齊烜赫熾炎乎梁陳周隋之間王公卿士上焉倡
導豪賈大姓下焉服從父提子手不釋不歸兄詔弟耳
不佛不師貨貝玉帛懽樂棄施膚髮肢體無所愛恠州
供里養家擎戶跽祈利益怖罪苦心誠力勤一以宗乎
其教如趨市然故金碧丹刻制擬王者不謂之僭矣而
涼寒而燠鐘鼓而食不謂之泰唐高祖念其如是也用

傳奕益兵蕃生術武德中將持斷力行以會建成之變
禪代已畫於中道明皇開元初宰相姚崇籍其徒無壯
者髮男女二萬人武宗聽羅浮道士議會昌五年詔壞
寺招提蘭若合四萬四千還其人二十六萬宣宗即位
憤道士議者戮於市遂復成樹逮黃巢兵火五代亂離
既涸而浮既窒而流既槁而榮既踣而興其故何哉源
素深根素固也國朝四聖垂八十年而又日浚而月培
之今四海九州其居其人之數復不減會昌前嗚呼其

盛矣乎雖所謂一二人焉其亦如之何哉古太末之地
有舍利塔院年祀彌遠棟敗梁仆邑人江延厚遽興其
廢建釋迦殿與其像崇崇眈眈輪奐華麗因而增葺之
曰法堂曰方丈曰門曰官院無慮月四百萬錢起明道
二年九月九日訖慶厯四年六月十九日院成明年十
月十二日始為記銘曰修身治心得佛之深清淨慈智
乃佛之事相好顯顯金碧穹穹雖曰外飾俾人內恭斯
廟有塔是瞻是崇完堅弗隳永焉無窮嘉祐三禩素秋

之李建者江氏永以為識

有美堂記

宋 歐陽修

嘉祐二年龍圖閣直學士尚書吏部郎中梅公出守於杭於其行也天子寵之以詩於是始作有美之堂蓋取賜詩之首章而名之以為杭人之榮然公之甚愛斯堂也雖去而不忘今年自金陵遣人走京師命予誌之其請至六七而不倦予乃為之言曰夫舉天下之至美與其樂有不得而兼焉者多矣故窮山水登臨之美者必

之乎寬閒之地寂寞之鄉而後得焉覽人物之盛麗夸
都邑之雄富者必據乎四達之衝舟車之會而後足焉
蓋彼放心於物外而此娛意於繁華二者各有適焉然
其爲樂不得而兼也今夫所謂羅浮天台衡嶽廬阜洞
庭之廣三峽之險號爲東南奇偉秀絕者乃皆在乎下
州小邑僻陋之邦此幽潛之士窮愁放逐之臣之所樂
也若乃四方之所聚百貨之所交物盛人衆爲一都會
而又能兼有山水之美以資富貴之娛者惟金陵錢塘

然二邦皆僭竊於亂世及聖宋受命海內為一金陵以後服見誅今其江山雖在而頽垣廢址荒烟野草過而覽者莫不為之躊躇而悽愴獨錢塘自五代時知尊中國效臣順及其亡也頓首請命不煩干戈今其民幸富完安樂又其俗習工巧邑屋華麗蓋十餘萬家環以湖山左右映帶而閩商海賈風帆浪舶出入於江濤浩渺烟雲杳靄之間可謂盛矣而臨是邦者必皆朝廷公卿大臣若天子之侍從又有四方遊士為之賓客故喜占

形勝治亭榭相與極遊覽之娛然其於所取有得於此者必有遺於彼獨所謂有美堂者山水登臨之美人物邑居之繁一寓目而盡得之蓋錢塘兼有天下之美而斯堂者又盡得錢塘之美焉宜乎公之甚愛而難忘也梅公清慎好學君子也視其所好可以知其人焉

廣德湖記

宋 曾 鞏

鄞縣張侯圖其縣之廣德湖而以書并古刻石之文遺余曰願有記蓋湖之大五十里而在鄞之西十二里其

欽定四庫全書

卷二百六十

源出於四明山而引其北為漕渠泄其東北入江凡鄞之鄉十有四其東七鄉之田錢湖溉之其西七鄉之田水注之者則此湖也舟之通越者皆由此湖而湖之產有鳬雁魚鼈茭蒲葭芡葵蓴蓮芡之饒其舊名曰鷺脰湖而今名大厯八年令儲仙舟之所更也貞元元年刺史任侗又治而大之中元元年民或上書請廢湖為田任事者左右之為出御史李後素驗視後素不為撓民以得罪而湖卒不廢刺史李敬方與後素皆賦詩刻石

以見其事其說以為當時湖成三百年矣則湖之興其在梁齊之際與宋興淳化二年民始與州縣強吏盜湖為田久不能正至道二年知州事丘崇元躬按治之而湖始復轉運使言其事詔禁民敢田者至其後遂著之於一州勅咸平中賜官吏職田取湖之西山足之地百頃為之既而務益取湖以自廣天禧二年知州事李夷庚始正湖界起隄十有八里以限之湖之濱有地曰林村沙沫曰高橋臘臺而其中有山曰白鶴曰望春自太

平興國以來民冒取之夷庚又命禁絕而湖始復天聖
景祐之間民復相率請湖為田州從事張大有按行止
之而知州事李照又言其事報如至道詔書照以刻之
石自此言請湖為田者始息而康定元年縣主簿曾公
望又益治湖至張侯之為鄆則湖久不治西七鄉之農
以旱告張侯為出營度民田湖旁者皆喜願致其力張
侯計工度財擇民之為人信服有智計者使督役而日
主之一不以屬吏人以不擾而咸勸趨於是築環湖之

隄凡九千一百三十四丈其廣一丈八尺而其高八尺
廣倍於舊而高倍於舊三之二鄞人累石墜水闕其間
而扃以木視水之小大而閉縱之謂之碶於是又為之
益舊總為碶九為埭二十隄上植榆柳益舊總為三萬
一百丈又因其餘材為二亭於隄上以休而與望秦白
鶴之山相值因以其山名山上有廟一以祠神之主此
湖者一以祠吏之有功於湖者以熙寧元年十一月始
役而以明年二月卒事其用民之力八萬二千七百九

十有二而其材出於工之餘既成而田不病旱舟不病
涸魚雁菱葦果蔬水產之良皆復其舊而其餘及於比
縣旁州張侯於是可謂有勞矣是年予通判越州事越
之南湖久廢不治蓋出於吏之因循而至於不知所以
為力予方患之觀廣德湖之興以數百年危於廢者數
矣由屢有人故屢以治蓋大厯之間溉田四百頃大中
八百頃而今二千頃矣則人之存亡政之廢舉為民之
幸不幸其豈細也與故為之書尚俾來者知毋廢前人

之功以永為此邦之利而又將與越之人圖其廢也張
侯名岫字子堅以材聞去而為提舉兩浙路常平廣惠
倉兼管勾農田差役水利事方且用於時云

鄞縣經游記

宋 王安石

慶厯七年十一月丁丑余自縣出屬民使浚渠川至萬
靈鄉之左界宿慈福院戊寅升雞山觀硤工鑿石遂入
育王山宿廣利寺雨不克東辛巳下靈巖浮石湫之壑
以望海而謀作斗門於海濱宿靈巖之旌教院癸未至

蘆江臨決渠之口轉以入於瑞巖之開善院遂宿甲申
游天童山宿景德寺質明與其長老瑞新上石望玲瓏
巖須猿吟者久之而還食寺之西堂遂行至東吳具舟
以西質明泊舟堰下食大梅山之保福寺畢過五峯行
十里許復具舟以西至小溪以夜中質明觀新渠及洪
灣還食普寧院日下如吳林村夜未中至資壽院質明
戒桃源清道二鄉之民以其事凡東西十有四鄉鄉之
民畢已受事而余遂歸云

宸奎閣記

宋蘇軾

皇祐中有詔廬山僧懷璉住京師十方淨因禪院召對
化成殿問佛法大意奏對稱旨賜號大覺禪師是時北
方之為佛者皆留於名相囿於因果以故士之聰明超
逸者皆鄙其言詆為下俚之詞璉獨指其妙與孔老合
者其言文而真其行峻而通故一時士大夫喜從之遊
遇休沐日璉未盥漱而戶外之屨滿矣仁宗皇帝以天
縱之能不由師傅自然得道與璉荅問親書頌詩以賜

之凡十有七篇至和中上書乞歸老山中上曰山即如
如體將安歸乎不許治平中再乞堅甚英宗皇帝留之
不可賜詔許自便躋涉江少留於金山西湖遂歸老於
四明之阿育王山廣利寺四明之人相與出力建大閣
藏所賜頌詩榜之曰宸奎時京師始建寶文閣詔取其
副本藏焉且命歲度一人躋歸山三十有三年年八十
三軾出守杭州其徒使來告曰宸奎閣未有記君逮事
昭陵而與吾師遊最舊其何以辭謹按古之人君號知

佛者必曰漢明梁武其徒蓋嘗藉口而繪其像於壁者
漢明以察為明梁武以弱為仁皆緣名失實去佛甚遠
惟仁宗皇帝在位四十二年未嘗廣度僧尼崇侈寺廟
干戈斧鑕未嘗有所私貸而天下卒以歸仁此所謂得
佛心法者古今一人而已璉雖以出世法度人而持律
嚴甚上嘗賜以龍腦鉢孟璉對使者焚之曰吾法以壞
色衣以瓦鐵食此鉢非法使者歸奏上嘉歎久之銘曰
巍巍仁皇體合自然神曜得道非有師傳維道人璉逍

遙自在禪律並行不相留礙於穆頌詩我既其文惟佛
與佛廼識其真咨爾東南山君海王時節來朝以謹其
藏

月湖記

宋 舒 亶

湖在州城之西南隅南隅廢久矣獨西隅存今西湖是
也其縱南北三百五十丈其衡東西四十丈其周四縱
七百三十丈有奇其中有橋二絕湖而過日憧憧然天
禧間直館李侯夷庚之所建也然僻在一隅初無游觀

人跡往往不至嘉祐中錢侯君倚名公輔始作而新之
總橋三十丈橋之東西有廊總二十丈廊之中有亭曰
衆樂其深廣幾十丈其前後有廡其左右有室而又環
亭以為島嶼植花木於是遂為州人勝賞之地方春夏
時士女相屬鼓歌無虛日亭之南小洲前此有屋纔數
椽乃僧定安守橋之所後沒廣今遂以為僧院壽聖是
也其西又有佛祠四并其東皆鄉士大夫之所居其北
有紅蓮閣大中祥符中章郇公名得象常倅是實創之

有記在焉閣之北即郡酒務故時使人即湖以汲水勞費甚乃隄湖之中畜清流作樓於其上以輓轆引而注之至今以為便然是湖本末圖志所不載其經始之人與其歲月皆莫得而考蓋嘗聞之父老明為州瀕江而帶海其水蓄淺而易旱稍不雨居民至飲江水是湖之作所以南引它山之水畜以備旱歲始末之信也熙寧中歲大旱闔境取汲於其中湖為之竭既又穴為井置廬以守之鄞令虞君大寧常記其事刻石於壽聖院乃

知父老之傳不誣也錢侯去距今幾三紀矣而湖輒浸
廢不治其亭南既隄以為放生池瀕湖之民人緣隄以
植菱芡之類至占以為田淀淤蕪沒幾不可容舟元祐
癸酉劉侯純父名淑來守是邦連歲小旱乃一切禁止
而疏浚之增卑培深環擁松柳復因其積土廣為十洲
而敞壽聖之閣以其名名之蓋四明之景物具焉湖遂
大治然其意初不在遊觀也古人於事蓋不苟作惟其
利害伏於久遠難知之中所以後世貴因循者或莫之

省而好功之士至樂為之紛紛也明有數湖危於廢者
不特是湖也若劉侯可謂有志於民矣故具論之以冠
諸國庶來者有考焉元祐甲戌三月記

披雲亭記

宋
沈與求

宣和四年春秘閣曾侯自山陽移守嘉禾在三吳為吏
郡封域儉狹而物產饒衍居民敦本好約稱易治侯至
因其俗施教條數十民畏慕之相戒毋犯侯令越數月
政成從容與僚吏曰郡雖小然介江湖之間水陸舟車

孔道四出賓客之至無虛日顧地洿下無高明之居以
稱游晏何以壯千里觀望盍圖之先是內相葉公道卿
於子城西北築亭榜曰披雲後人更名樓庠屋三楹歲
久且圯又西北其戶通闌煙塵宛轉於几席間非登臨
之美侯乃以完堞餘工悉撤去故屋基增高培薄取名
材更南向為亭外施重簷而中敞之深明洞達丹碧燦
然亭西挾以水閣曲欄橫檻映帶左右它日與客登焉
送天末之孤帆迎海上之遙岑目力所窮與空為際更

唱遞嘯觴酌流行神意徜徉如在塵垢外侯舉觴屬某
曰茲遊樂予為我記之某謂成壞哀樂奄忽之變在物
也物不可以為常顧吾所建立有不可磨滅者物則託
焉以垂不朽登斯亭也徘徊四顧蓋吳越交兵之場而
句踐夫差之爭雄也深溝高城忽變而為荒田野草穴
狐狸而伏鱗鯨事可哀已前年盜弄潢池兵傳吾城連
三日夜民大震擾天子至出禁旅討平之盜去而城完
因得創亭其上使吾輩一觴相屬是可樂也於是乎書

婺州新城記


宋楊時

宣和二年盜發幫原蹂數州之地皆狼狽失守而婺女
罹害尤甚天子惻然遴選儒臣鎮撫茲土河南范公實
被其選公至之日殘孽未殄四境之內鉦鼓相聞環寇
師且數萬而轉輸餽餉取具焉夷傷之餘竄伏山谷還
定安集無一不得其所越歲杪寇平百廢具舉頑兇革
心屏息聽命無敢復出為惡者政成治定乃顧謂僚屬
曰國家承五季之亂海內分裂擅強兵負固而不服者

相屬獨錢氏據有全吳首效臣順為屏翰垂二百年無東顧之憂故城郭不修士卒不練一夫跳梁而六州暴骨蓋承平之久吏惰而不知戒故也則城郭之不完其可忽諸於是因其舊而新之周十里基三丈面廣三之二而高倍之濬隍為池陶甃為堞募七邑之夫倍其庸食因以濟其艱食費無慮數百萬而一毫不取於民又載食與醪時往勞之故人樂於趨事而忘其勤以工計之六萬一千七百有奇經始於九月甲戌告成於十有

二月丁酉望之屹然山立不可凌犯民吏歡欣鼓舞相與詣余而告曰昔之堦垣廢址踐為通衢故關無譏宵行者無禁草竊姦宄得以自肆今吾民奠枕而居無異時之患寧可不知其所自耶願紀成績以昭示於後余嘗讀易至坎之彖曰王公設險以守其國而後知先王為城郭溝池之固蓋本諸義理之不可無者故文武以天保以上治內采薇以下治外命南仲往城朔方以六月之詩考之文武所以治內外者本末先後廢一不可

也今嫠女之政綱條紀律纖悉備具而又完其郭郭為邦人無窮之賴芳猷偉績追配南仲是宜有紀也使後之人知本末先後之序無廢前修豈小補之哉



浙江通志卷二百六十